

Ramai 'suami tersakiti' kunci mulut

Kuala Lumpur: Kelebihan fizikal, cemburu, panas baran, status kerja atau pendapatan, latar belakang isteri yang memang kasar, sikap isteri yang dominan dan suka mengawal suami antara faktor wujudnya isu 'isteriku gengster'.

Bukan itu saja faktor hasutan orang ketiga, isteri yang mempunyai masalah kesihatan mental (depression), kerasukan ataupun isteri ganas disebabkan respon dan reaksi kepada layanan kasar suami itu sendiri juga menjadi punca seorang isteri yang fitrahnya lembut sanggup menegakkan suami.

Peguam Syarie Muim Abdullah berkata, kes membabitkan golongan isteri memukul atau mendera fizikal suami bukanlah mustahil terjadi.

"Ia wujud dalam masyarakat kita namun kebanyakan kes-kes yang berlaku tidak diadukan kepada pihak berkuasa.

"Tidak semua kes diadukan (kepada pihak berkuasa) kerana ada yang tak tahu perbuatan mencederakan suami adalah satu kesalahan jenayah di bawah kanun keseksaan selain perbuatan berdosa.

"Selain itu, ada (suami) yang tidak membuat aduan atau ambil tindakan kerana tersepit dengan keadaan untuk menjaga hubungan keluarga, air muka atau ego sebagai suami dan pelbagai



Ada yang tak tahu perbuatan mencederakan suami adalah satu kesalahan jenayah di bawah kanun keseksaan selain perbuatan berdosa"

Muim Abdullah

alasan lain," katanya ketika dihubungi wartawan Harian Metro.

Muim Abdullah berkata, dari pandangan hukum syara' dan undang-undang, apa sahaja bentuk perbuatan yang boleh mendatangkan kecederaan kepada orang lain adalah jelas satu kesalahan.

Katanya, pelaku boleh diadukan kepada pihak berkuasa dan didakwa di Mahkamah mengikut kanun ke-

seksaan. (Seksyen 323, 326A atau apa-apa peruntukan yang berkaitan).

"Dari segi syara' pula, perbuatan itu jelas berdosa untuk isteri mencederakan suami dan boleh disabitkan nusyuz oleh Mahkamah Syariah.

"Jika disabitkan kesalahan, isteri tidak berhak untuk diberikan nafkah selama tempoh isteri disabitkan nusyuz oleh mahkamah. Isteri yang berkasar dan mencederakan suami juga adalah isteri yang derhaka," katanya.

Muim berkata, suami yang berhadapan dengan masalah ini perlu berusaha mengatasi masalah dengan mengenalpasti punca sebenar masalah yang memicu isteri bertindak ganas.

"Perbuatan ganas ini selain membabitkan emosi marah, ia juga berkaitan dengan masalah kesihatan mental. Oleh itu, suami perlu mengenalpasti perbuatan ganas isteri itu perlu dilakukan dalam keadaan sedar dan waras.

"Suami juga perlu ada usaha untuk perhatikan, memahami dan menilai sikap isteri dan bertindak sewajarnya," katanya.

Selain itu, mereka perlu merujuk masalah rumah-tangga kepada pakar seperti kaunselor, pegawai psikologi atau pakar-pakar psikiatri bagi mencari penyelesaian.

Mengulas lanjut, Muim berkata, suami juga perlu faham dan mengawal isteri sebaiknya supaya tidak timbul masalah atau punca yang menyebabkan pergaduhan dan keganasan.

"Jika keganasan atau ancaman isteri tidak mampu dikawal, suami boleh mengadu kepada pihak berkuasa untuk diambil tindakan selanjutnya.

"Suami juga boleh mendapatkan *Interim Protection Order* dari Mahkamah sebagai jaminan keselamatan, jika perlu," katanya.

Muim berkata, keluarga, rakan dan masyarakat, perlu prihatin dengan masalah berkaitan dan tidak melewatkan persepsi negatif terhadap apa sahaja bentuk keganasan dalam rumahtangga.

"Bagi dorongan, panduan dan idea kepada suami yang ada masalah supaya mereka berani untuk bertindak menyelesaikan konflik.

"Ini kerana tidak semua orang ada *tolerance* (tolak ansur) yang tinggi dalam menghadapi masalah dan berani bertindak menyelesaikan masalah. Dorongan dan sokongan orang sekeliling adalah sangat membantu," katanya.

"Stigma 'takut bini' tidak sepatutnya dijadikan sebagai satu sindiran semata-mata. Hakikatnya, memang ada suami yang 'terpaksa' takut bini disebabkan ancaman dan keganasan dihadapi," katanya.






Namun, kata Muim, ramai suami yang 'tersepit' untuk menyelesaikan masalah atau bertahan sahaja dengan masalah dan mengharapkan perubahan.

"Oleh itu, suami mesti tegas dan ambil tindakan jika wujud keganasan dalam rumahtangga. Begitu juga sebaliknya dengan isteri," katanya.

KEBANYAKAN mangsa enggan tampil membuat laporan kerana mahu menjaga air muka keluarga.



BILANGAN KES KEKERASAN FIZIKAL ISTERI TERHADAP SUAMI

Tahun 2018		59
Tahun 2019		48
Tahun 2020		44
Tahun 2021		122
Tahun 2022		140

ANTARA KES KEKERASAN FIZIKAL OLEH ISTERI TERHADAP SUAMI

8 Jun 2023

Seorang isteri berusia 28 tahun dituduh di Mahkamah Majistret, Teluk Intan Perak kerana menyebabkan kecederaan ke atas suami dan mengugut membunuh mangsa. Wanita itu dikatakan mengacukan pisau kepada suaminya sebelum menumbuk mangsa di bahu kanan selain menendang lutut kaki kanannya.

1 November 2022

Seorang suri rumah berusia 25 tahun dituduh di Mahkamah Majistret Ayer Keroh, Melaka, kerana memukul kepala suaminya dengan menggunakan telefon bimbit hingga cedera, awal September lalu.

11 Jun 2022

Seorang suami berusia 42 tahun meninggal dunia selepas kepalanya dipukul dan ditetak isteri serta adik lelakinya dalam kejadian di sebuah rumah di Jalan Bahagia, Seksyen 25, Shah Alam. Suspek dipercayai berang selepas mangsa sering mabuk.

15 Julai 2022

Seorang lelaki berusia 44 tahun maut disyaki dipukul oleh isterinya berusia 35 tahun di Flat Nipah, Taman Daya, Johor Bahru.

20 Oktober 2021

Seorang suami berusia 45 tahun maut ditikam dengan besi pemegang payung oleh isterinya yang didakwa curang dalam kejadian di kediaman mereka di Kampung Laksamana, Batu Caves, Gombak.

3 Jun 2019

Berang ditegur kerana asyik bermain judi dalam talian, seorang isteri bertindak membelasah suaminya menggunakan batang besi di rumah mereka di Kampung Panji, Lahad Datu, Sabah. Mangsa yang luka pada kening, pipi dan dada membuat laporan polis.

